

comme quaresme ou en jour de feste. Après, quant l'en peche a escient l'en peche plus assez que en ignorance. Après l'en doit dire la condicion du pechié, car c'est plus grant¹² pechié a fame mariee ou a pucele ou en homme ou en fame de religion ou en persone ordenee a prestre ou a diacre, selonc ce que l'ordre est plus grant. Après, se pechié est contre nature. Après quantes foiz l'en est en cheoit en cest pechié et combien l'en y a demoré. Après si doit on dire se l'en c'est combatu contre la temptation ou se l'en aprocha cie le pechié, ou se l'en c'est combatu en la temptation car acun sont qui n'atendent pas la temptation, la pourchacent et s'i embatent. Après la cause et la temptation qui avient en pechié faire, doit l'en dire, et toutes les autres achoisons et les circonstances qui pueent engregier le pechié. Après, doit l'en courre par les membres donc l'en a pechié. Primes doit l'en aler au cuer et puis aus autres membres et dire ses pensees, quelles eles sont, ou charneles ou esperituelles comme contre la foy, ou d'envie ou de rancune ou d'autre maniere donc il y a trop. Les charneles apartiennent aus deliz et aus desirrers de la char. Si doit l'en bien regarder en toutes ses pensees; se il y a consentement ou longue demoree ou delit qui vault bien aucune foiz consentement. Et de toutes pensees se doit l'en confesser. Après, doit l'en prendre garde se l'en a pechié par les membres du cors, car

l'en i seut pechier en moult de manieres. Premierement ou chief ou l'en met souvent moult grant poine et grant coust comme font souvent ces dames et ces demoiseles qui tant cruiement parent leur chiés de precieus aornemens pour pure vanité et pour plere et pour traire a pechié. Donc ele pechient moult de foiz griefment et mesmement celes qui font les grans cornes ou de leur cheveus ou des autrui que elles semblent trop bien foles fames assez. En y a assez a de vanité en ces chiés en laver, en pignier, en fader, et en mirer, donc Dex se courrouce moult de foiz. De ceste vanité ne son pas quites les hommes qui metent si grant paine en eulz pignier, en eulz mirer, en leur chiés bien assembler et duire a force a ce qu'il aient biau dorenlot. Qui est enseigné de folie et de telles vanités se doit l'en confesser. Aprés doit l'en courre aus cinq sens du cors ou l'en peche moult souvent; en folement regarder; ou par les oreilles en folement escouter et oir medisans et losengiers vanitez ou autres folies ou autres pechiez; par la bouche en folement parler, en trop boire, et en trop mengier; ou par les narilles en trop soy deliter en bonnes odeurs; ou par folement touchier et deshonestement en sa fame qu'il a, ou autre qui pis vaut, soit homme, soit fame. Aussi se doit l'en confesser des outrages que l'en a fet en robes ou en chevaucement et de touz autres defauz donc l'en est recordant.

Einsi est la confession enterine quant l'en dit touz ces defaus grans et petis, et c'est la quarte condicion qui doit estre en confession.

La quinte condicion est que l'en se doit confesser humblement, car li pecheurs parle a Dieu qui voit son cuer. Donc le confeseur n'est que l'orelle Dieu, et ce que il ot, il ne set pas comme homme mes comme Dieu et doit dire ses pechiés a grant paour et doit son cuer tout espandre avant li, comme dit l'Escripture. Ausi comme l'en espart plain pot d'iaue, quant l'iaue est espandue il n'i demeure point de couleur comme en leit ne d'odeur comme en vin ne saveur comme en miel, ausi ne doit l'en retenir du pechié puis que l'en l'a dit en confession; ne la couleur c'est mauvese maniere que l'en a eu, ou en parler ou en regarder ou en mauvese compagnie siure ou en autre chose qui ait couleur de pechié. Aprés, l'en doit lessier la saveur du pechié qui pense as pechiez qu'il a feit et se delite en la pensee et li plest, mes il doit penser a ses pechiez a grant paour et a grant doleur et soy confondre en soy mesmes et avoir grant homte devant Dieu et ferme propos que jamés en pechié ne recorra, se l'en devoit desmenbrer. Aprés doit l'en lessier et fuir l'oudeur. Il sont aucun qui lessent le pechié mes volentiers en oient parler, mes qui bien se repent il n'en doit pas oir parler, ançoiz en doit avoir grant abomination.

son pechié pour honte. Et ce fait li dyables qui au devant li met la honte pour li clorre la bouche, aussi comme li lierres qui gete la petite renoille¹⁶ en la bouche au chien que il n'abaie, car de tele nature est celle petite renoille que elle fait le chien muet quant l'en li gete en la gueule. Mes li pechierres doit penser que la honte que l'en a du dire le pechié est la plus grant partie de l'amende; après, il doit volentiers boire un petit de honte pour eschiever la grant honte que li pecheeur atendent au jour du jugement quant touz li monde verra leur pechiez.

La seconde chose est mauvese poor de fere grant penitance, donc li deables met en l'oreille du pecheur: "Tu ne pourroies faire ces aspres penitances et si ne pourroies lessier tes acoustumances." Tiex gens semblent le cheval ombrage qui a paour de l'ombre que il voit, et certes ce n'est que ombres quanque l'en puet faire de penitance au regart de la poine d'enfer ou de feu de purgatoire.

La tierce chose est mauvese amour que li deables a si le pecheur alechié que il ainme tant son delit que il ne le veult lessier, si pense que por neent se confesseroit. Si s'endort en son pechié comme li pors en la boe.

La quarte chose est esperance de longue vie donc li deables li dit: "Tu es joenues hons; tu vivras longuement. Jeue toy et fay ta volenté; tu recouveras bien a toy

confesser." Mes il ne regarde pas la mort qui le guete et qui le prendra plus tost que il ne cuide. Que Diex qui promet pardon a celui qui se repont, ne ne li promet point de demain, si comme dit saint Grigoires. Donc li deables se jeuvent souvent du pecheur aussi comme li chaz de la soriz quant il a prise. Et quant il s'en est longuement jouez si la menjue.¹⁷ La cinquieme chose est desesperance ou li deables met le pecheur, mes il doit penser que Diex pardonne a ceuls qui se repentent legierement et plus est volentiers du donner que nous dou demander.

Aprés la confession vient la satisfacion, c'est l'amende que l'en doit fere selonc l'arbitre et le conseil du confesseur qui doit jugier l'amende du mesfet ou en jeunes ou en aumones ou en autres choses, selonc ce que li pechiez le requiert; et li deables¹⁸ doit volentiers obeir au phissien pour avoir santé, et li bonz filz fere volentiers le commandement son pere esperituel pour le preu de l'ame. Or as tu oy les trois choses qui enternent le hauberc de penitance donc il arme son nouvel chevallier pour vaincre la bataille. Il n'a garde de la seconde mort, si comme dit saint Jehan; la premiere mort de l'ame est la mort de pechié que l'en vaint par penitance par quoy l'en eschape la seconde mort. C'est la premiere branche et l'arbre de proece que veincre tel bataille.

Aprés ceste bataille vient une autre, car quant li homs se repent de son pechié lors vient une nouvelle luite en son cuer; quele penitance de vie il menra, et moult y a de ceuls qui en ceste bataille sont recreant. Car si comme Diex dit en l'Evangile, ore croient, ore mescroient; ore vuelent, ore ne vuelent; ore proposent, ore est noient; dont il sont aussi comme li coches qui est sus le moustier qui se tourne a tous vens. Mes quant li homs se ahert a Dieu et affirme son cuer en bon propoz, lors est ceste bataille outree, et lors le fait Diex ferme et estable comme un piler en son temple, c'est en sainte Eglise, si comme sains Jehans dit. C'est la seconde victoire et le loier que il reponnent.

Aprés ceste luite vient la tierce que li homs a a sa char meisme, qui se plaint moult et murmure, quant elle commence a sentir les durtez et les aspreces des penitances et moult se combat pour revenir a ses vielles coustumes. La char est la male fame, dont Salomon parle, qui plus li fait sa volonté et pire la, et plus li est contraire. Et qui se lessa a sa char vaincre il en entre en un moult grant servage et moult vil, qui fu senefié par Sanson fortin, qui par ce que il se lessa vaincre a une fame, perdi sa grant cheveleure de son chief ou la grant force estoit, et les yex du front et la force du cors, et chei es mains de ses anemis qui le firent moudre en la mouele honteusement. Tout ce font li dyable

espirituelment a celui qui a sa char se lesse vaincre. Qui ceste bataille vaint, Diex li promet la blance robe de chaasté et de innocence, si comme dit l'Apocalipse.

Aprés ceste bataille vient li mondes et dame Fortune a toute sa roe, qui assaut l'omme a destre et a senestre, qui sont deus moult fors batailles ou moult de gens sont vaincus, et plus en y a destre que a senestre de vaincus, si comme dit li Sautiers. Car plus est fort la temptation qui vient des tenneurs des richeces et des delices que li dyables offre et met au devant, que n'est celle qui vient d'aversité, comme de povreté et de maladie que Diex envoie; et cil qui fuit la premiere bataille et vaint et despit de cuer les prosperitez du monde, Dieu li promet honneur et hautesce ou ciel. Car il le fera seoir avec lui en son thornne, si comme dit l'Apocalipse. A celui qui veintra l'autre bataille qui est a senestre es aversitez de cest monde, Dieu li promet la manne reposte, ce est la grant douceur et li grant delit de paradis, que nus ne li pourra tolir. Et par la manne qui estoit si douce, que chacun a couvoit tel saveur con il vouloit, est entendue la grant douceur, le grant delit que Diex a estoie et repost a ceulz qui veintront les aversitez de cest monde.

La sisieme bataille qui est moult fort et contre^{l9} les mauvés qui sont en cest monde, qui sont membre d'Antecrist qui gouvernoient les preudommes par leur force comme fesoient anciannement li tirant les martirs, li herege les bons

Crestiens, que a poines s'osera nus reclamer Crestiens par la force d'Antrecrist et de ces membres; c'est la beste que saint Jehan vit, qui guerroit les sains donc nous avons pieça parlé. Les membres de ceste beste se moustrent ja es mauvés princes, es mauvés prelaz qui par leur grant couvoitise foulent et estorchent et menjuent leur sougez, si que li preudomme qui sont dessous elz en ont assez a souffrir et assez de meseses et de granz meschiez. Mes cil qui tout prent en pacience, comme fist Job, et se fie du tout en Dieu ceste bataille. Et a celui qui la veintra, Diex li promet que il li donra poveir sus ses anemis, comme dit saint Jehan en l'Apocalipse.

Aprés toutes ces batailles vient la derreniere qui est la plus fort. Car li deables qui moult est malicieus et sotils quant il voit que li hons est montez sus la montaigne de perfection et il a toutes ces batailles devant dites vaincues, l'assaut par vaine gloire et par presumpcions, car il li est avis que il est moult preudomme et moult bien de Dieu, pour ce qu'il a tant fait et souffert pour lui, pour quoy il chiet aucune foiz de si haut si bas comme fist Lucifer. Pour ce est grant mestier que li hons soit sages et avertiz pour soy deffendre de vaine gloire qui fet l'ariere garde, car en la queue gist souvent li encombrer, et pres du port periz souvent la nef qui va segurement en haute mer. Dont il convient

que il adrece son voile, c'est s'entencion, au port de salut,
c'est a Jehucrist, par le vent de ferme amour et de grant
desirier de Dieu. C'est la fin de justice dont nous avons
dessus parlé qui vient du dont de force et de la vertu de
proesce. Comme li bons chevaliers et preuz et hardiz et a
esté en moult de proesces et a grant talent et grant fain
de moustrarre assez de proesces en tournoiemens ou en batailles
pour soi aloser; et certes qui a grant amour de Dieu et
grant fain et grant desirer de son salu, il veint legierement
ceste bataille. Car il veult ne ne désire en ceste vie fors
ce qui est en l'oneur et en la gloire Dieu et au salu de
s'ame, et qui ceste bataille vaint, il gaigne le loier donc
saint Jehan parle la ou nostre Sire parle en l'Apocalipse,
"A celi qui veinera Je li donray a mengier de l'abre de vie,
qui est ou mileu de paradis,"²⁰ c'est Jhesucrist qui donne vie
pardurable, donc tout li saint vivent en la gloire de paradis
et sont tuit saoulé et rempli. Et pour ce est la beneurte
que nostre bon Mestre promet a ses chevaliers quant Il dit,
"Beneuré sont cil qui ont fain et soif de justice,"²¹ c'est
de Dieu servir et amer, car il seront saoulé du frui de
l'abre de vie. C'est la fain et la perfection de ceste vertu
qui est apelee proece a quoy nous mainne le don de force.

Ainsi comme li Sainz Esperis donne force

Aussi comme li Sainz Esperiz donne force et viguer de grans choses emprendre, aussi donne il conseil par quoy l'en vient a bon chief et a bonne fin de ce que l'en emprent. C'est une grace que li Sainz Esperiz donne qui est apelé le don de conseil, par quoy li hons a grant avisement et est de grant deliberacion en ce que il est emprent, et que il ne sont trop hastif en ses¹ emprinses. Car si comme dit un philosophes, granz choses sont faites, non mie par force de cors ne d'armes, mes par bon conseil. Et un autre si dit qui ot non Socrates, que de chetif conseil se repent on aprés, et pour ce dit Salemon, "Ne faiz riens sanz bon conseil, et aprés le fait tu ne t'en repentiras pas." Ceste grace se moustre en homme en trois manieres; premierement en querre bon conseil. "Biau filz," dit il,² "quier touz jours conseil a sage homme." Et Salemon si dit, "La ou il n'a bon gouvernement, li pueples dechiet et est tout desconfit mes il est sauvez quant il a bon conseil." Et li sages Tulles dit que pou valent les armes par dehors se bon conseil n'est par dedens. Mes garde toy, dist l'Escripture, de mauvés conseilleurs et ne te conseille pas as fox, car il n'ainment que ce qui leur plest a Dieu. Aussi enseigne l'Escripture que l'en doit querre conseil aus anciens, non pas aus jounes qui ne sont pas esprouvez de besoignes, mes li ancien qui ont veü et esprouvé les choses et les sens et

et les conseus; pour ce que Roboan le filz Salemon lessa le conseil aus anciens preudommes, pour le conseil des joeunes perdi il la plus grant partie de son royaume. Aprés, qui a ce don il examine les conseus que l'en li donne et pense a grant deliberation, c'est au grant avisement, se l'en le conseille bien et loyaument, et non legierement croire au conseil ou au dit d'un homme ne de deus, combien qu'il soient ses privez ne ses amys, donc Seneques dit que sagez hons examine ses conseuls et ne croit pas legierement treuve qui le deçoit souvent. Aprés qui a ce don il obeist a bon conseil quant il la trouve. Car pour neent quiert conseil qui n'a talent du fere, donc dit Salemon qu'il semble aus foul que il soit tous³ jours en droite voie, mes li sages ot bons conseus que li foul despisent. Le plus profitable conseil que li hons puisse avoir est li conseus que nostre Sires Jehucrist de qui vient tout bon conseil, si comme dit l'Escripture. C'est li conseus que il nous donne en l'Evangille quant il dit, "Se tu veulz estre parfet, va et vent quanque tu as, et donne aus pouvres et vien emprés moy si auras grant tresor es ciex."⁴ Regarde et pense qui donne tel conseil, car c'est si comme dit en la sapience Dieu li Pere, li anges de conseil qui est vrai Dieu et vrai hons qui vint en terre pour nous conseiller et pour nous enseigner la voie et le droit sentier d'entrer en paradis, c'est li sentiers de povreté par ou li Sainz Esperiz enseigne

ceus qu'il a enluminez de bon conseil. Voirs est que en autre maniere et par autre voie se puet l'en sauver, comme par la voie des commandemens nostre Seigneur, ou l'en se sauve en mariage en vegant, es richeces du monde, quant l'en en use bien. Mes li Sainz Esperiz par le don de conseil meine et conduit plus droitemeht et plus setirement par le sentier de povreté, par quoy il ont en despit le monde, et metent sous pié toute couvoitise pour l'amour de Dieu. Cist dons estrepe du cuer le pechié d'avarice et de couvoitise et il plante un moult bel arbre, c'est la vertu de misericorde qui est doleur et compassion d'autrui mal et de autrui souffreté.

DES SEPT DEGREZ DE MISERICORDE

Cest arbres a sept degrez, comme les autres, par ou il croist et profite. Ce sont sept choses qui moult esmeuvent homme a misericorde et avoir compassion d'autrui mal. La premiere chose qui doit esmouvoir homme a misericorde est¹ nature. Si comme dit li livres qui parle de la nature des bestes, nul oysel ne norrist autre qui ne soit de sa nature. Aprés ce livre memo dit que l'une jument norrist le faon a l'autre quant ele est morte. Aprés, l'en a moult de foiz veü et esprouvé que les louves norrissent les enfans gitez et les defendent des autres bestes. Bien doit doncques avoir pitié et compassion du mal cil autre qui li est semblables en nature, car tuit sommes fez d'une nature et a une forme et a une essample, comme nous avons dit pieça.

La seconde chose qui doit trece homme a misericorde et a compassion d'autrui mal est grace, car tous sommes membres d'un cors, c'est de sainte Eglise; par grace est l'un membre compassion de l'autre. Aprés, tuit sommes rachatez d'un meesmes pris, c'est du precieus sanc Jehucrist, que il espandi en la croiz pour nous rachater de la mort pardurable. Quant li Filz Dieu fu doncques si piteus et misericors envers nous, bien devons avoir pitié et compassion li un de l'autre et aider l'un a l'autre et secourre. Aprés, tuit sommes freres et de pere et de mere par grace et par foy, car nous

sommes filz Dieu et de sainte Eglise, et li uns freres doit aidier a l'autre quant il voit son besoing. Car au besoing voit on qui amis est.

La tierce chose qui doit homme esmouvoir a misericorde, c'est le commandement de la sainte Escripture qui conseille et commande les oevres de misericorde et desus toutes autres oevres, donc Salemon dit; "Garde que ton chief ne soit sans huile." Par l'uile qui norrist le feu en la lampe est enten-due misericorde² qui doit tous jours estre en ton chief, c'est en ton cuer. Et tout aussi comme l'uile seurmonte en la lampe les autres liqueurs, ausi misericorde les autres vertuz. Et ausi comme l'uile norrist et garde le feu en la lampe; et quant l'uile faut li feus est estainz, aussi misericorde garde le feu de l'amour de Dieu ou cuer. Et quant misericorde i faut, comme dit saint Jehan. "Qui vera," dit il, "son frere avoir mesese et necessité ou besoing et li clora l'uis de son cuer," c'est a dire qui en ara et l'en aidera se il puet; "comment," dit il, "est l'amour de Dieu en li?"³ Aussi comme se il deist, "Ce ne peut estre que l'uile de misericorde est faillie en la lampe de son cuer?" Aprés li bons Thobies enseignoit son filz et disoit ainsi; "Biau filz, soies misericors si con tu pourras; se tu as assez de biens, donne largement; se tu as petit, donne lieement." Et nostre Sire dit en l'Evangile, "Va et ven quanque tu as et donne aus

povres." C'est la vertu que la sainte ame loe plus generau-
ment. Car c'est la vertu qui plus plest a Dieu; l'Escripture
le tesmoigne. Donc Diex dit par le prophete; "Ge veil," dit
il, "misericorde, non pas sacrefice." Et saint Augustin dit
que il n'est rien qui tant face homme amiabile a Dieu comme
pitié. Moult de gens font a Dieu sacrefices de geunes et de
pelerinages, d'asprece de cors, mes a faire aumosnes sont il
chiche et aver. Aprés, moult de grans gens a qui Diex a don-
né largement des biens temporels font sacrefices non mie a
Dieu mes au monde ou au dyable, en ce que il despendent fole-
ment leurs biens en vanitez, en fourfés pour le boban du
monde. Mes a donner pour Dieu sont il aver et dur comme uns
aymans.⁴ Aprés, aussi comme misericorde plest a Dieu, desplest
elle au dyable. Car c'est l'armeüre par quoy il est plus tost
vaincus, si comme dit une glose sus le Sautier. Car il ne
puet souffrir l'oudeur de tel oingnement, ne que li boteriaus
l'oudeur de la vigne. Tele oudeur ne pot souffrir Judas quant
il vit que on oinst le chief Jhesucrist de precieus oingne-
ment, car il le sambloit chose perdue, et miex amast large-
ment en sa bourse de l'argent pour sa couvoitise. De tel
gens est sires uns dyables qui est Clobourse, que uns her-
mites vit que il avoit l'office de clorre la bourse aus avers
qu'elles ne fussent ouvertes pour faire ammoshes.

La quarte chose qui doit esmouvoir a misericorde; c'est

la grant largesce nostre Seigneur qui donne largement a tous, selonc ce que il sont, si comme dit saint Jaque, et faire son soleil luire sus les bons et sus les mauvés, si comme dit l'Evangille. Puis donques que il est si larges que il nous donne quanque nous avons de bien, nous devons estre larges et courtois li uns vers l'autre. Ainsi le nous commande il en l'Evangille quant il dit: "Soiez misericors aussi comme nostre Pere est misericors."⁵ Li fils doit ressambler au pere, autrement il forligneroit. Et pour ce dit li Sages en l'Escription: "Soiez misericors comme leurs peres et leurs meres; soiez comme maris et fammes; ainsi serez fils du très haut," ce est de Dieu.

La quinte chose qui doit home esmouvoir a misericorde est l'onner de Dieu; car si comme dit Salomon, "Cil honneure nostre Seigneur qui fet bien aus povres."⁶ Car se que l'en fet aus povres l'en le fait a Dieu, si comme il meſſmes le tesmoingne en l'Evangille; "Ce que vous avez fait," dit il, a un de mes plus petis vous m'avez fet."⁷ Li povre sont la petite mesnie nostre Seigneur; qui les honneure par oevre de misericorde il honneure Dieu, car qui honneur la mesnie il honneur le Seigneur et qui fait honte a la mesnie il fait honte au Seigneur. En ce avons nous bele example a monseigneur saint Martin a qui Diex s'apparut après ce que de-parti son mantel au povre et estoit affublez et disoit a ses

anges: "Martin m'a revetu de ceste robe."

La sizieme chose qui doit home esmouvoir a misericorde si est la paour du jugement. Qui sanz misericorde sera fet a celui qui ne fera les oevres de misericorde; car si comme Diex dit en l'Evangille, quant vendra au jugement la sentence sera donne contre ceus qui n'auront fait les oevres de misericorde. Que Diex fera la sourde oreille a ceuls qui le font maintenant aus povres, si comme il apert par l'exemple d'un preudome qui escondi le ladre; et pour ce que il li vea s'aumonsne, Diex li vea une goute d'yaue quant il fu ou feu d'enfer. Aussi aus foles vierges qui n'avoient point d'uile en leurs lampes Diex leur clost la porte aus noces et leur dist, "Je ne soy qui vous estes,"⁸ si qu'eles demorent dehors. Aussi fera il au jour dou jugement aus avers et as couvoiteus qui n'auront le conduit de misericorde, qui conduit les ames em paradis et leur fet voie a venir devant Dieu, si comme dit l'Escripture, aussi comme l'en fet voie et oevre l'en porte a celui qui biau present porte. Certes maudiz sera a qui pitié le destornera a celui jour quant Diex donra sentence moult espoventablement, qui si sera ferme et estable e par justice confermee que ja nul jour n'iert rapellee. Ceste justice dit par devant il fera comme roys, puis getera son grant escommeniment comme souverains eveques et souverains apostres, car il est roys et eveques, si comme dit

l'Escripture. Car il prist nature humaine et lignage des roys et des eveques. Cist escommeniens sera gitez sus ceuls qui seront a senestre; nuls rien sera esceptez. Ce seront les mauvés que il maudira pour leur desloyautez et ainsi leur dire, "Allez, li maleoit, ou feu pardurable en enfer le puant, es tenebres horribles qui est appareillez aus dyables horribles et a ses ~~con~~paignons qui ont fait les messages." || Helas, ceste sentence toute soit elle brieve sera moult angoisseuse et moult grieve quant il les chacera de sa compaignie. Moult fait a redouter si dure departie.

La septieme chose qui doit esmouvoir a misericorde est li fruis qui naist de cel arbre qui apert en moult de manieres. Premierement en ce que misericorde empetre pardon des pechiez, dont misericorde a les lettres de pardon et de indulgence. Car Diex dit en l'Evangille, "Beneoit soient li misericors, car il auront misericorde."⁹ Aprés, celle meisme lettre dit, que se nous pardonnons, il nous alume,¹⁰ Diex nous pardonnera, non pas autrement. Aprés, misericorde est la bonne marcheande qui par tout gaaingne et nulle foiz ne pert; car si comme dit saint Pol, misericorde vaut toutes choses; la pierre seroit moult precieuses qui vaudroit a toutes choses. C'est misericorde, qui gaaingne les biens temporels, les biens espirituels, et les biens pardurables des biens temporex. Dit Salomon, "Honneüre Dieu de ta

richesse et de tes biens donne aux pauvres, et Dieux remplira tes greniers de blé et tes celliers de vin."¹¹ Mes entent bien ceste parole que il dit de ta richesse et de tes biens, non mie de l'autrui comme ceus qui vuelent faire ammosne de ce que il ont par tolte ou par rapine ou par usure ou par autre mauvese reson, et font souvent d'autrui cuir large coroie, mes du tien propre que tu tiens loyaument honneüre Dieu. Car l'autrui tu es tenus a rendre. Aprés, il dit que tu donnes aux pauvres, non pas aux riches mes aux souffraiteus, et Dieux le te rendra, si comme dit l'Evangille. Misericorde est une semince qui fruttefie miex en maigre terre qu'elle ne fet en crasse.

Comment misericorde emploie les biens temporels¹

De ce avons nous moult de bonnes examples, dont je vueil ci aucuns raconter:

L'en list de saint Germain d'Aucerre que quant il vint a l'issue d'une ville il demanda a son dyacre se il avoit point d'argent, et il respondi que il n'avoit que trois deniers. Car saint Germain avoit tous donné aux pauvres. Lors li comanda que il les donnat aux pauvres car Dieux avoit bien de quoi il les pestroit celle journee. Li dyacres a grant paine et en grant murmure en donna deus deniers et remit le tiers. Quant il s'en aloient leur chemin li sergent a un riche homme li aporta deus cens sols. Lors appela son dyacre et li dist

que il avoit tolu aus povres un denier, et se il eüst le tiers denier donné aus povres li chevaliers li eüst envoié trois cens sols.

Aprés l'en list en la vie saint Jehan l'aumosnier qui estoit ainsi appelez pour les grans aumosnes que il faisoit, que un riche homme fu robé de larrons si que riens ne li demoura, si s'en vint complaindre au dit Jehan et li dist s'aventure. Cil qui en ot grant pitié commanda a son despensier que il li donnast quinze livres d'or. Li despensiers par sa couvoitise ne l'en donna que cinq. Tantost une gentil fame envoia au dit Jehan cinq cens livres d'or. Il appela son despensier et li demanda combien il avoit donné a celui et il respondi quinze livres. Et il li dist que non avoit que cinq, et quant il le sot par celui meſſmes qui les avoit receūz. Si dist a son despensier que s'il eüst donné quinze livres que il avoit commandé nostre Sires li eüst envoié par la preude-fame mil et cinq cens livres. Et quant il demanda a la preude-fame, que il fist appeler, combien elle li avoit lessié, elle respondi que premierement elle li avoit lessié en son testament mil et cinq cens livres et les il devoit envoier; mes quant elle regarda aprés en son testament elle trouva les mil livres effaciez de son escript et ainsi sot la bonne fame que Diex vouloit que elle ne n'envoiaſt que cinq cens.

Aprés saint Grigoire raconte que saint Boniface dés ce

que il estoit enfes, il estoit si piteus que il donnoit souvent sa cote et sa chemise aus povres, ja fust ce que sa mere ne l'enbatist souvent. Ore avint que li enfes vit des povres qui avoient mesaise; il espia que sa mere n'i estoit pas, il courut aus greniers, et a quanque sa mere avoit assamblé pour l'an dil donna aus povres pour Dieu. Et quant sa mere vit et sot le fait, elle fu tout hors du sens. Li enfes depria nostre Seigneur et les greniers furent tout plain.

Aprés il fu un povre homme, si comme l'en dit, que avoit vache. Si oy dire a son prestre en son sermon, que Diex disoit en l'Evangille, que Diex rendoit a cent doubles quanques l'en li donnoit. Li preudoms du conseil sa fame donna sa vache en esperance que il en eüst cent en lieu de celle. Mes quant il ot grant piece attendu, et celle promesse li demourroit, il cui-da que son prestre l'eüst deceü, si se pensa que il l'occirroit, Si se leva une nuit pour occirre son prestre, et quant il fu en la voie si trouva une grant masse d'or. Et lors pensa que Diex li avoit rendu sa promesse et s'en retourna en pais.

Aussi d'une autre, pour ce que il avoit oy la parole de l'Evangille que Diex rendroit a cent doubles ce que l'en li donnoit il donna sa vache au prestre qui estoit riches.

Li prestres la prist volentiers et l'envia le prestre² avec les autres qu'il avoit. Quant vint au soir la vache au preus'en vint a son ostel et amena avecques lui toutes les vaches

au prestre jusque a cent. Quant li preudomes vit ce si se pensa que ce estoit la promesse de l'Evangille, que Diex li avoit rendue et li furent jugiees a estre seües devant l'evesque.

Ces examples moustrent bien que misericorde est bonne marcheande, car elle monteploie les biens temporels. Aprés, elle empetre vers Dieu les biens espirituels et les biens pardurables, dont saint Pol dit que elle vaut a toutes choses car elle donne vie de grace en présent et vie de gloire en la fin. Et pour ce dit bien David ou Sautier que Diex aime misericorde, vérité, et justice. Car Diex donna grace en cest siecle et gloire en l'autre. Aprés, pour tout conclurre elle garde homme et delivre de moult de perils et de mort espiri-tuel, c'est de pechié mortel et de mort corporele. Que moult de mors ont ressuscitez pour les oevres de misericorde que il avoit fait, dont il y a moult d'essamples es escriptures et es vies des sains et de mort pardurable. C'est de la mort d'enfer dont Thobie disoit a son fils, "Biaus fils," fait il, "soiez piteus et misericors tant comme tu porra." Car ammosne delivre et garde home de tout pechiez et de mort, et deffent a l'ame qu'elle ne voist es tourmens d'enfer. Ore aus tu oy les degrez de la vie de misericorde par ou elle croist et profite.

Des rains de misericorde

Ore escouvient vecoir des branches de misericorde. Et de ceste arbre par ou il se moustre et estent cils arbres a plus de branches que les autres, car il a branches a destre et a senestre. A destre sont les oevres de misericorde qui regardent l'ame, ce sont les oevres espiritueles. A senestre sont les oevres corporeles qui appartiennent au cors. A destre ces arbres a sept branches.

La premiere si est en donner bon conseil a ceus qui mestier en ont et pour l'amour de Dieu purement; non pas pour couvoitise de gaaing corporel comme font li mauvés advocas qui prennent a deus mains et donnent moult souvent moult de mauvés conseuls pour deniers, pour paour, ou pour faveur des riches hommes. Mes cil qui ont les yex devant leurs pechiez doivent issir de pechié ou ceuls qui sont hors de pechié ont a euls garder comme doivent faire les confessors, les prelas. Et les autres preudomes en quelque estat que il soient, cil font la premiere oevre de misericorde espirituele, c'est la premiere branche a destre.

La seconde branche est bien a enseignier a ceuls que l'en a a gouverner comme li prelat leurs sougiez, que il doivent paistre de bele doctrine et de bons essamples; aussi li mestres ses desciples, en science et en bonnes meurs; aussi les peres et les meres leurs enfans a ce que il se gardent de

mentir, de jurer, de mauvés jeus, et de mauvese compaignie. Et meismement les enfans aus riches éoivent estre les miex enseigniez et les miex enformez en bonnes meurs, car li enfés veut tous jours tenir sa premiere fourme comme fet li escoliers, et pour ce les doit l'en enfourmer en bonnes oevres. Car si comme dit li Proverbes; "Qu'aprent poulain a douceüre, tenir le veut tant comme il dure."

La tierce branche est chastier et reprendre les fols et les mauvés de leurs folies. Et ce appartient aus prelas et aus princes qui doivent chastier leurs sougiez quant il seuent que il sont mauvés, car quant il sueffrent leurs pechiez la ou il les pueent amender il en sont parçonniers. Nuls ne doit, ne prince ne prelat ne vaillans homs, souffrir nulle mauvestié environ soi. Et se il le set ou cuide, et il n'i met conseil, c'est signe que il n'est pas preudoms. Car l'en seult dire, "A tel seigneur, tele mesnie," et souvent avient que li sires est a tort diffamez par la mauvese mesnie. Et pour ce ne paour ne amour ne familiarité de personne ne doit le seigneur retraire d'oster les mauffaiteurs d'environ soi. Car il doit plus douter et amer Dieu que homme. L'en doit amer les peronnes , mes l'en doit haïr les pechiez. Et si doivent savoir li prelat et li prince et le autre seigneur que ignorance en ceste partie ne l'escuse point, car il sont tenus a savoir comment leurs gens se portent en leurs ostels ou en leurs offices. Tenir et en

doivent enquerre par bonnes gens et loyaus qui Dieu doutent et crient. Dont il ne seront pas quités au jour des grans assizes, ce sera au jour du jugement, pour dire, "Je n'en savoie noient."

La quarte si est conforter les malades et ceus qui sont en tribulation et en adversité, par bonnes paroles que il ne se desespoirent ou que le cuer ne leur faille, aussi comme saint Pol qui dit, "Confortez ceus qui sont foibles de cuer."¹ Et Salomon dit que cis qui est a malaise de son cuer sesjoira de honne parole. Car si comme il mesme dit, aussi comme li cuers se delite en bonnes oudes et en bonnes paroles du vray ami, c'est cil qui aime en enfermeté aussi comme en prosperité. Car au besoing voit on qui amis est et dois savoir que quatre choses confortent homme qui est en adversité et en tribulation.

La premiere chose est penser aus paines d'enfer qui tant sont aspres. Que ce n'est que ointure quanque l'en puet souffrir en cest monde. Dont saint Grigoire disoit a nostre Seigneur, "Sire, ci me brullez, ci me decoupez, mes que pardurablement ne me dampnez." Il fait bon souffrir la verge de chastement pour eschaper de la glaive qui occist pardurablement, c'est de la mort d'enfer. Qui morir ne puet Diex moustre grant samblant d'amour quant il envoie adverzitez tempreles, car si comme il dit en l'Evangille, "Je chastie ceus que j'aime."² Le buef quant l'en le veut tuer engresse;

celui que l'en veut garder met l'en au jou. Grant signe d'amour mausterroit li roys et grant honneur feroit a celui a qui il envoieroit son hanap, a quoi il boit le hanap nostre Seigneur a quoi il but. Si sont les tribulations de cest monde, c'est la premiere sausse a quoi l'en doit mengier ceste viande, penser aus paines d'enfer; c'est une sausse de vinaigre qui tolt la saveur du bon vin, c'est des delis du monde, aussi comme la saveur du vinaigre qui tolt la saveur du bon vin.

La seconde chose qui mout conforte en tribulation, c'est pensee au loier de paradis. Car si comme dit saint Gregoire, ce allege moult le travail quant l'en a esperance d'avoir bon loier.

La tierce chose si est penser a la passion nostre Seigneur Jhesucrist. Que il souffri pour nous, il n'est riens qui tant adoucist les paines et les tribulations temporeles ce nous est trop bien senefié en l'Escripture. La ou les fils d'Israel vindrent a une yaue qui estoit si amere que il n'en povoient boire, Diex moustra a Moysen un fust, et il li dist que il le mesist en l'yaue; et quant il li ot mis, elle fu toute douce les yaues. Ameres sont les tribulations de cest monde; le fust qui les adoucist c'est la croiz ou li Fils Dieu pendi pour nous. Car qui pense bien a celle doleur que il souffri en la crois pour nous il n'est honte ne adversité ne tribulation,

corporele ne temporele, qui ne soit douce a souffrir.

La quarte chose si est penser aus biens que les adver-sitez et les tribulations font a ceus qui les sueffrent paciau-ment. Car les tribulations espruevent le chevalier Dieu. Li chevaliers ne cognoist sa force jusques a tant que il ait este empressé d'armes; dont saint Pol dit que pacience esprueve l'omme, et l'angele dist a Thobie, "Pour ce que tu plescies a Dieu il convenoit que temptation t'esprouvast." Aprés les temptacions purgent l'ame, aussi comme la fournaise purge l'or, comme li flaiaus le grain, comme la lime le fer, si comme dit saint Grigoire. Aprés les temptacions est la medecine qui gue-rist l'ame de pechié. Car si comme dit l'Escripture, gries maladie fet l'omme aler sobre que pechié enyvre souvent. Dont saint Grigoire dit, "Ne te soit pas dure chose ce que tu sueffres encors par dehors quant tu es gueris de la maladie de pechié pardedens." Aprés par les tribulations l'en gaaigne la couronne de gloire dont saint Jaque dit, "Boneüré est qui sueffre temptation,"³ ce est adverstié aussi comme li bons chevaliers qui sueffre et endure les cops. Car quant il sera bien esprouvez il en aura la couronne de gloire, Ces quatre pensees devant dictes confortent moult ceus qui sont en ad-versité.

La quinte branche de misericorde est pardonner son

mautalent. Car, qui ne pardone son mautalent et ses felonies, s'aumosne ne li vaut riens. Car Diex ne reçoit pas le don de la main tant comme la felonnie doit ou cuer. Dont Diex poise le don selonc la volenté et pour ce dit nostre Sire en l'Evangille; "Se vous ne pardonnez li uns a l'autre nostre Sires ne vous pardonnera mie."⁴ Dont cil qui ne veut pardonner dit contre soi toutes les fois que il dit sa patrenostre, car il prie que Diex le pardoinst aussi comme il pardonne son mautalent. L'en list de l'empereur Theodose que il tenoit a grant despit ce que l'en li faisoit quant l'en li prioit que il pardonnast. Et comme plus estoit courouciez tant pardonnoit il plus legierement car il vouloit miex atraire ses gens par de debonnaireté et par amour que par paour.

La sizieme branche si est avoir pitié et compassion des pecheours et de ceus qui sont en tribulation ou en povreté ou en adversité, car li uns membres doit porter la maladie a l'autre. Dont saint Pol disoit, "Qui est malades et je ne sui malades avec li?"⁵ Et saint Grigoire dit que tant est li homs plus parfaiz comme il sent plus en soi les autres doleurs.

La septime branche est prier pour les pecheurs neis pour les anemis. Car ainsi le commande nostre Sires en l'Evangile, "Priez," dit il, "pour ceus qui mal vous font, ainsi serez vous fils nostre Pere qui est es ciex."⁶ Aussi comme s'il vousist dire autrement, "N'estes vous pas fils de Dieu?

Et se vous n'estes fils de Dieu vous n'avez riens en son heritage."⁷ Ore est dont grant anmosne et grant preu de prier pour le pecheurs et pour ses anemis. Ce sont les sept branches a destre de cest arbre.

Aussi comme cis arbres a sept branches a destre, il en a sept a senestre. Ce sont les oevres de misericorde qui regardent le cors, aussi comme les autres devant dites regardent l'ame. La premiere branche est pestre les povres et les mesaisiez. En ce nous amonnesta la saint Escripture en plusieurs lieus. Premierement Thobie qui disoit a son fils, "Mengue ton pain avec les souffraiteus et qui muerent de fain; se ton anemi a fain, donne li a mengier, et se il a soif, donne li a boire." Aprés, nostre Sires dit en l'Evangille, "Quant tu feras grant mengier, apele les povres, les foibles, les avugles, et les clops, et tu seras boneurez; car il ne le te pueent rendre, mes Diex le te rendra pour euls en la resurrection."⁸ Ceste bien est contre les riches hommes qui font les grans outrages des vins et des viandes por les bobans du monde et n'ont nulle foiz pitié des povres. Mes il doivent avoir grant paour que il ne leur en meschilee aussi comme au riche glouton, dont Diex parle en l'Evangille, qui mengoit tous les jours delicieusement et plantureusement, et lessoit morir le povre ladre de fain a sa porte. Mes en la mort de l'un et de

l'autre li dez fu moult changiez car le ladre fu portez des anges en paradis et li gloutons avers ot sa sepulture non mie en terre benoite, car il estoit si escommeniez de l'auctorité de Dieu, mes ou puant enfer ou il a souffert dure jeune d'yaue pour sa langue refroidier. Helas, se toute l'yaue de la mer li courroit pardessus la langue ne seroit elle pas refroidié en ce feu pardurable qui estaindre ne puet, et toute ce porroit faire une goute. Pour ce fait il bon pestre les povres, car l'en en eschape des paines d'enfer et en gaigne l'en la joie de paradis, si comme dit l'Escripture. Dont nostre Sires dira a ceus qui auront repeü les povres, "Venez le beneoit ou regne mon Pere es ciex, car quant j'oi faim vous me donnastes a mengier et quant j'oi soif vous me donnastes a boivre; car ce que vous feistes aus povres, vous le feistes a moi."⁹

La seconde branche est revestir les povres nus, c'est a dire que l'en leur doinst a vestir et a chaucier qui le puet faire. Ainsi enseignoit Thobie son fils, "Cuevre les nus de tes robes."¹⁰ Et Ysaie le prophete dit, "Quant tu verras le povre nu, cuevre le." Par tele oevre resuscita saint Pierre la preudfame qui avoir a non Dorcas, car elle revestoit les povres, si comme dit l'Escripture. La robe que l'en donne au povre est un memorial que il prie pour celui qui li a donné.

La tierce branche est prester aus povres a leur besoing

et pardonner leur la debte quant il ne la puet rendre; car ce n'est pas seulement aumosne de donner, mes c'est grant aumosne de¹¹ prester sanz usure et sanz mauvese entencion, mes purement pour Dieu. C'est ce que Diex commande en la vielle loy, la ou il dit, "Se un de tes freres chiet en povreté tu n'endurciras pas ton cuer ne ne retreras ta main, mes l'ou verras au povre et li presteras ce dont il auras mestier."¹² Et nostre Sires dit en l'Evangille, "Prestez," dit il, "a ce lui qui mestier en a et qui vous en requerra sanz esperance de gaaing temporel et Diex le vous rendra."¹³ C'est aperte-ment contre les usuriers qui vuelent tous jours plus que il ne prestent, ou en deniers ou en services ou en autres choses. Mes il commande aprester au povre purement et Diex le rendra a usure, et se li povres a qui tu as presté ou qui te doit ne puet paier, tu li dois pardonner; car ainsi le dit nostres Sires en l'Evangille, "Se vous ne pardonnez li uns a l'autre Diex ne vous pardonra mie." Et de ce met il example du felon serjant a qui son seigneur avoit pa~~nd~~onné sa debte et pour ce que il ne volt pardonner a celui qui li devoit; li sires rappela sa bonté que il li avoit faite et le fist destraindre et lier, jusques a tant que il eüst rendu quanque il devoit. Nostre Sires ne vous pardonra mie, si comme il dit, se vous ne pardonnez li uns a l'autre.

La quarte branche est visiter les malades. C'est une

oeuvre qui plest moult plus a Dieu que jeunes ne traviaus temporels. Dont l'en trueve en la vie des peres que un hermite demanda a un ancien pere li quels estoit de plus grant merite, ou cil qui jeunoit siz fois en la semaine et tra-veilloit et labouroit de mains en autre maniere, ou cil qui servoit aus malades. Li preudoms respondi que cil qui jeune et se travaille; se il se pendoit par les narilles, il ne se porroit comparer aus malades; tele oevre vaut a eschiever pechié dont c'est aussi comme un grant remede contre pechié. Et pour ce dit Job, "Visite ta samblance. Ce sont les malades qui sont samblabes a toi en nature; car il sont home comme tu es et ainsi tu ne pecheras pas, car Diex te gardera de pechié pour teles oevres faire." Et saint Jaque si dit que c'est une religion sainte et nete devant Dieu visiter les orfelins et les veves fames en tribulations. Dont l'en conte d'un moult grant pecheur qui ala outre mer et se mist en l'ospital pour servir les malades. Il avint une foiz que il li prist une abomination d'un malade a qui il lavoit les piez. Tantost a plaine gorge il but celle yaue contre son cuer, et quant il l'ot bête il la senti très douce et très soueve et très bien flairant sus tous bons oingnemens. Et ce fu grant signe que ses pechiez li furent pardonnez par cele oevre. Après, par celle oevre l'en acquiert grant perfection de sainte vie dont li Sages dit en l'Escripture, "Ne t'anuit pas visiter les

malades car par ce seras tu confermé en l'amour de Dieu.¹⁴
 Après l'en atent grant loier, si comme tesmoingne l'Evangille. Dont l'en conte d'une dame qui ot non Marie d'aignes¹⁵ qui fu moult sainte fame et converti son seigneur a ce que il lessierent quanque il avoient et se mistrent a servir aus mesiaus, par quoi il vindrent a grant perfection. Dont il fu revelé que son seigneur qui avoit esté ses compains en humilité de servir aus malades seroit ses compains en la hautesce de la gloire pardurable. De ce meſſme nous donne nostre Sires un essample il en l'Evangille, que il touchoit les mesiaus et les garissoit. Li serjans ne doit pas avoir honte ne desdaing de visiter les malades et d'euls servir quant li Sires du ciel et de la terre vint en terre et ou monde pour euls servir et visiter, dont il prist fourme de serjant, et di saint Pol, pour nous servir qui estions malade de pechié.

La quinte branche est herbergier les trespassans et les povres qui n'ont point d'ostel. C'est une des oevres de misericorde qui plus plest a Dieu si comme il apert par les essamples de l'Escripture. Premierement d'Abraham qui reçut les anges en samblance de pelerins, et li promistrent que sa fame qui estoit vieille et brehaigne concevroit un fils Loth. Pour ce que il recevoit les povres et les gardoit en hospitalité, reçut les anges qui le garderent du pechié de Sodome. Et pour ce dit saint Pol, "Ne lessiez pas hospitalité"¹⁶ par quoi

moult de preudfames ont pleu a Dieu, si que il recevoient les anges en lieu des povres. Et n'est mie merveille se tel gent reçoivent les angeles car il reçoivent nostre Seigneur; si comme il dit en l'Evangille; "Qui vous reçoit," dist il, "il me reçoit,"¹⁷ car ce que l'en fait au povre l'en fait a li, si comme il dit. Dont saint Grigoire dit que un preudome qui mout estoit piteus et moult recevoit volentiers les povres en son hostel les reçut, si comme il avoit a coustume, et quant il cuida donner a laver a un mesaisié qui illec en samblance de povre estoit, si se esvanny, dont il se mervilla moult. Et la nuit nostre Sires li apparut et li dist que il l'avoit es autres jours receu en ses membres mes y celui jour il avoit receu en sa personne. Après hospitalité vaut miex que abstinence ne autre labour, dont l'en trueve en la vie des peres que en Egypte avoit saint pere qui recevoit tous les trespassans qui mestier en avoient et leur donnoit liement de ce que il avoit; il avint que uns homs de grant abstinence fu herbergiez laienz en son hostel qui volt jeumer et ne volt mengier a la requeste du preudome qui l'a voit receu. Lors li dist li preudoms qui l'avoit herbergie, "Alons, biau frere, souz cel arbre la hors et prions a nostre Seigneur que cils arbres s'encline a l'oroison de celui qui plus li plest." Et quant il orent fait leurs prieres li arbres s'enclina a l'oroison de celui qui recevoit les povres, non pas a celui qui faisoit les grans abstinentes. Moult y a d'autres biaus

essamples d'ospitalité, mes longue chose a raconter.

La sizieme branche de cest arbre est visiter ceuls qui sont en chartre. Ainsi faisoit Thobie qui aloit a tous ceus qui estoient emprisonné et les confortoit de bonnes paroles. Et Salomon dit en Proverbes, "Delivre," fait il, "ceuls que l'en mainne a mort."¹⁸ Dont Daniel le prophete delivra Susanne de mort et nostre Sires delivra la fame qui avoit esté prise en avoutire qui devoit estre lapidee selonc la loy. Non mie pour ce que l'en doie faire justice des maufaiteurs, mes il enseigne les juges quels il doivent estre et comment il doivent les autres jugier. Dont en cest essample il enseigne quatre choses que chascun juge doit garder en jurement.

La premiere est grant deliberation et grant avisement et grant conseil dont Job disoit, "La cause que je ne savoie, je l'en cerchoie et enqueroie trop diligament."¹⁹ Et c'est entendu en ce que nostres Sires dist quant li Juif orent accusée la fame et escript en la terre de son doit. En l'escripture faite de son doit entendons nous discretion et il ne donna pas tantost sentence.

La seconde chose si est droite entencion que l'en ne flechisse pour priere ne pour don. C'est entendu en ce que quant il ot escript, sà se dreça et s'estut tout droit.

La tierce chose si est bonne vie, car cil qui les autres juge doit estre de bon conscience. Autrement il doit avoir paour de celle sentence. Dont il dit en l'Evangille que tel jugement comme vous faites des autres l'en fera de vous. Et saint Pol dit aus mauvés juges ainsi, "En ce que tu juges autrui, tu te dampnés, car tu fais ce pour quoi tu juges les autres."²⁰ Dont nostre Sires dist quant il fu levez, "Cil de vous qui est sanz pechié, si gete la premiere";²¹ et quant il oirent cest sentence il s'en alerent, li uns avant, li autres arriere, car il se tenoient plus pecheours que celle que il vœuloient condempner.

La quarte chose est pitié et compassion que li juges doit avoir de ce que il doit jugier. Car il se doit plus flechir par humanité a misericorde que soi enroidir par durté en justice, et misericorde sanz justice est lascheté. Et pour ce est l'une de ces deus vertus souvent accompagnie a l'autre en la sainte Escripture, mes toute voies, dit l'Escripture, que misericorde surmonte justice. Et saint Jehan bouche d'or²² dit que au jour de jugement miex vaudra rendre reson de misericorde que de faire durté de justice. Et saint Jaque dit jugement sanz misericorde sera fait a celui qui ne fet misericorde. Et pour ce nostre Seigneur puis que il fu relevez si s'enclina vers terre, et puis delivra la fame, car li juges se doit flechir par compassion vers celui que il doit jugier.

Car se il juge mauvesement il sera jugiez mauvesement. Ore est grant anmosne de visiter les prisonniers et d'euls racheter et delivrer, et pour ce volt nostre Sires descendre en enfer pour delivrer les ames des sains qui la estoient.

La septisme branche est ensevelir les mors. De tele oevre est moult loé Thobie en l'Escripture, "qui ensevelissoit les mors et enlessoit son mengier. Et nostre Sires en loa la Magdalene de l'oingnement que elle li espandi sus son chief, dont il dit que elle li avoit fait de la sepulture. Et Joseph demanda le cors nostre Seigneur et quant il l'ot, il l'enseveli moult diligament. Li ancien estoient moult curieux de leurs sepultures, si comme dit l'Escripture, et avoient grant regart a la saintee de leurs peres. Et pour ce vouloient estre enseveli avecques euls. Dont Jacob²³ dist a son fils, "Joseph, ne me enseveli pas," dist il, "en Egypte, mes avecques mes peres."²⁴ Et pour ce fait il bon gesir avec les preudomes de religion, pour avoir leurs prieres a tele oevre faire doit esmouvoir nature. Dont l'en list ou livre de la nature des bestes; que li delfin quant il ont un delfin mort, il s'assamblient et l'emportent au fons de la mer et illuec l'enterrent. Se nature et pitié esmuet a ce les Sarrazin et les juis et les autres mescreans, moult doit esmouvoir en ce pitié enfourmee de foy crestienne qui regarde que les resusciteront et auront guerredon aus ames. Et pour ce qui

aime l'ame de son profisme il doit amer le cors et faire a la mort toute l'umanité que l'en puet. Ore as tu oy les branches de l'arbre de misericorde a destre et a senestre; ce sont les oevres de misericorde espiritueles et temporeles.

COMMENT L'EN DOIT FAIRE ANMOSNE

Mes pour ce que il sont moult de gent qui perdent leurs anmosnes et leurs autres biens que il font, pour ce que il ne le font pas, si comme il deüssent; pour ce te vueil moustrar briement comment l'en doit faire anmosne, a ce que elle soit profitable, et qu'elle plese a Dieu. Dont qui veut faire anmosne il doit regarder trois choses.

Premierement il doit regarder de quoi il doit faire anmosne, car il la doit faire du sien, non pas de l'autrui. Et de ce que il a de bon conquest et de loyal, Diex n'a cure de mauvés dons. Anmosne qui est faite de l'autrui, ou de tolte ou de rapine ou d'usure ou d'autre mauvés acquest, ne plest point a Dieu. Dont l'Escripture dit, "Tu ne sacrefieras pas a Dieu buef ne brebis ou il ait nulle tache."¹ Car Diex a grant abomination de tel sacrefice. Et li Sages dit en l'Escripture, "Qui fait sacrefice du chatel au povre, il fait aussi comme cil qui occist le fils devant les yex son pere."² Et saint Augustin dit, "Que don est ce quant li uns le prent lievement et li autres le depart en plourant?" Et pour ce doit regarder chascun de quoi il fait anmosne.

Aprés, il doit regarder a qui il la fait. Dont l'Escripture dit, garde a qui tu feras bien; fai au bon, c'est a celui que tu cuideras qui soit bon; et ne donne pas au mauvés, ne ne regarde pas les pecheurs, c'est a dire que tu ne dois

mie donner au mauvés pour reson de sa mauvestié, comme celles qui donnent aus ribaus et aus ribaudes et aus menestreuls pour leur mauvestié; ne autrement ne leur donroient riens qui est moult grant pechié, comme dient li saint. Mes qui leur donne non mie pour leur mauvestié, mes pour pitié et compassion de leur povreté ou de leurs fames ou de leurs enfans, se il les ont, ou de leurs peres ou de leurs meres, ou pour autre bonne reson comme pour euls retraire de pechié, il fait bien. Dont l'anmosne doit estre donnee aus povres, et plus a ceuls qui sont vrais povres de cuer et de volenté, qui ont lessié pour Dieu ce que il avoient ou povoient avoir, que a ceuls qui ne sont pas povre de volenté mes de pure nécessité. Et nepourquant toutes voies leur doit l'en volentiers donner et meisme-ment aus povres honteus et aus orfelins et aus veves fames et aus autres mesaisiez quant l'en voit leur besoing et l'en le puet faire. Se l'en est tenu aus estranges sur tous autres l'en est tenu a pere et a mere quant l'en voit leur besoing, car nature l'enseigne et Diex le commande. L'en list de la cygoingne³ qu'elle norrist son pere et sa mere, quant il sont vieil et il ne se pueent pourchacier. Dont nature enseigne que l'en doit bien faire a pere et a mere, et qui ne le fait il est desnaturez et peche outre nature et contre Dieu, qui commande honourer pere et mere, si comme il est moult de fois avenu.